

ONTŌNA VŌRPSALIŠA PĪMINAI

1978. gada 22. septembrī Vīnā slimnīcā, Indianapolē myra **Ontons** Vorpsalīts. Svētdiņā, 24. septembrī, Feeney-Kirby bērū nomā nūtyka aizlyugums par nūmirēju, kuru vadēja prelats A. Grosbergs. Sovā uzrunā prel. A. Grosbergs pasakavēja pī **Ontona Vorpsališa** rūseīgōs darbeibas. Jys beja školotōjs un šam dorbam nūsadeve ar sirdi un dvēseli. Bez sova teišō dorba jys arī aktīvi pīsadālēja sabīdryskajā dorbā. Jys beja dzili ticeīgs cylvāks. Pēc tam vysī kūpeji nūskaitēja Rūžukrūni prel. A. Grosberga vadeībā.

25. septembrī 10 stupdēs reitā Sv. Pītera un Pōvula katedralē prel. A. Grosbergs nūturēja Sv.

Mišu par aizgōjēju. Apglobōšona nūtyka Svātō Krysta kopsātā, Indianapolē.

Pēc apglobōšonas bērinīki sanōce Latvišu sabīdryskajā Centrā, lai kluseībā pīminēt aizgōjēju. Sīrsneīgā runā prelats A. Grosbergs pīminēja O. V. Vōrpsalīti kai ļūti ticeīgu un pošaizlīdžeīgu cylvāku. Indianapolē Latvišu katōļu bīdreibas vōrdā jys izsacēja pateiceibu par jō lelū dorbu katōļu sabīdreībā. Pēc tam atvodu vōrdus sacēja tautas darbinīks Francis Zeps. Jys nūrōdēja, ka jys ar Ontōnu Vōrpsalīti kūpā dorbojūšis jau vysu laiku, kai Latvijā tai arī trymdā. O. V. vīnmār bejis sadarbeīgs un atsauceīgs vysūs

lobūs pasōkumūs. Indianapolē Latvišu pensionaru bīdreibas vōrdā F. Zeps izsacēja pateiceibu par jō nanūgurstūšu darbeibu.

Ontons Vorpsalīts dzimis 1900. godā, 15. junijā, Leivōnu pogosta Vorpsalīšūs. Sovu pyrmū izgleiteibu jys baudēja Preiļu pamatškōlā. Pēc tam jys devēs uz Rēzekni, lai mocātūs Rezeknes piļsātas škōlā.

Ontons Vōrpsalīts beja lels patriots un kai jauneklis jau aizgōja „zajajūs“, lai ceineitūs par myusu tautas breiveibu un naatkareibu.

Sovas dorba gaitas O. V. sōce kai skolōtōjs Leiksnas pamatškōlā un pēc tam porsacēle strōdēt uz Neicgaļa pamatškōlu O. V. tūmār var saukt par daugovpilīti, jō šymā piļsātā jys nūdzeivōja vairōk kai dīvdēsmīt godu. Nu Neicgales jys pōrīt dorbā uz Daugovpiļs 1. pamatškōlu. Šeit jys atteista rūseīgu darbeibu nūdybynojūt mozpulku nūdaļu un tū vōdūt. Kai Mozpulku vadeitōjs jys bīži brauc uz mozpulku sanōksmem Reigā. Jō nūdybynōtais un vadeitais mozpulks dorbojōs ar ļūti lobīm panōkumim.

Pēc kaida laika **Ontons** Vōrpsalīts atstōja sovu audzynōtōja dorbu un pōrgōja Daugovpils piļsātas valdes dīnastī, kur jys ījēme izgleiteibas un vālōk finanču nūdaļas vadeitōja omotus.

Pa vosoras breivlaikim, kod O. V. atbraucis uz mōjom, jam vīnmār asūt paticis īt uz Peisu pūru laseit ūgas. Taipat pa atvalynōjumu laiku jys apceļōjis gondreīž vysu Latviju uz velosipeda. Tys jam sagodōjis lelu patyku.

Es personeīgi ar Ontōnu Vōrpsalīti īpasazynu 1943. godā Daugovpilī. Pī īpasazeišonas jys uz mani atstōja ļūti nūteikta rokstura un reizē arī ļūti sīrsneīga un pateikama cylvāka īspaidu. Tyvōk ar O. V. es īpasazynu šeit Indianapolē, kur daudzi latviši ir atroduši dzeives vītu. Indianapolē O. V. aktīvi pīsadālēja latvišu sabīdryskajā dorbā. Šymā dorbā jys nasaudzēja ni pyuļu, ni arī leidzekļus. Jys dorbojōs Indianapolē Latvišu bīdreībā, Indianapolē Latvišu katōļu bīdreībā, kur jys beja valdes priksādātōja vītņīks, apyupes organizacijā „Daugovas Vonogi“, Latvišu sabīdryskāja Centrā un Indianapolē pensionaru bīdreībā. Jys ļūti aktīvi pīsadālēja pī Latvišu sabīdryskō centra noma byuves un vīns pats pīstōdēja kūkus noma laukumā.

Vysur kur **Ontons** Vorpsalīts dorbojōs, jys vīnmār nōce ar lītišķim īrūsynōjumim un vīnmār beja saticeīgs ar vysim cylvākim. Jam nīkod nav patykušas nasaķaņas. Jys beja pōrlīceībā, ka vysu var nūkōrtēt mīrmīleīgā un pōrrunu kōrteībā.

Roksturojūt Ontōnu Vōrpsalīti varātu saceit, ka jys beja lels go-ra cylvāks. Jys daudz lasēja un beja labi informāts par pasaulja un vītejim nūtykumim. O. V. beja lels sovas tautas un tāvzemes mīlōtōjs. Jys beja ļūti taisneīgs un gūdeīgs cylvāks. Kaidā sarunā ar O. V. jys maņ atstōstēja šaidu epizodi nu sovas dzeives: 1940. godā junijā, kai zynoms, Padūmu savīneibas karaspāks okupēja myusu valsti. Kai jau tys nūtyka, tod tyuleņ apmainēja vōdūšūs darbinīkus valsts un pošvaldeību īstōdēs. Jys vēļ asūt palicis sovā omotā kai Daugovpiļs piļsātas finanču daļas vadeitōjs leidz vālam rudiņam. Kaidu dīnu pī jō piļsātas valdē asūt atnōcis kaidis bogōts Daugovpiļs tērgotōjs (bejušais) un jī pōrrunōjuši pādejūs nūtykumus un valdeibas maiņu. Mynātais tērgotōjs Ontōnam sacēja tai: „Tys kraslys uz kura jvus tagad sēžat ir zalta bedre. Te daudzi cylvāki ir palykuši bogōti, bet jvus naasot palicis bogōts sova gūdeīguma dēļ. Pī tam jvus asot izaturējis pret vysim cylvākim vīnaidi un nivīnam naasot aizskōris ciļvēceīgōs jyutas. Par tū jyusim lels paļdis.“ Tū pasacējis šys bejušais tērgotōjs pīsacēlis un aizgōjis.

Kūpsavylkumā par Ontōnu Vōrpsalīti varātu saceit tai, ka jys beja apgorōts ar taisneīguma, gūdeīguma un ciļvēceibas idealim.